

Jatian boríbacana iqui; bošhon paranta
yocáribicana iqui: -Parantaninra noa queenai
papá, nonra atsa ayamaque, bona ichayora iquetian
-aquín acana iqui.

Jatian jato yoia iqui: -Jacon iquenbira
maton ayamaque -aquín jato acá iqui. Jatian jato
yoia iqui: -Bitancanhuen paranta baquebó, icha
riqui huainco paranta -aquínqui jato acá iqui.
Jascáa bošhon oincanaqui icá iqui, paranta
peitiibi bina icha, pani panitinressa. Jatian
huetsa nia binaoma oinšhon joningui reraa iqui.
Caašh pošhóquetian, cahuanšhon tešhtecasaitian
joni binan queyóa iqui. Queyóa paranta biticoma
icá iqui. Jascara iquetianqui jaquiribi boríba-
cana iqui.

Bošhon cancan yocáribicana iqui: -Cancan-
bichoressa noa queenai papá -aquín acana iqui.

Jatian jato yoia iqui: -Bitancanhuen baque-
bó, icha riqui cancan -aquín jato acá iqui. Jato
jascáa bocana iqui, cancan bíí. Bošhon oincana-
qui icá iqui, cancantiibi shanó teyacaabo, jatíbi
mescó ronobo; cancan biticoma. Jatian jonibo
boríbacana iqui, jahuebioma jaton šhobon. Jatíbi
jahuéqui yocácanabi meniamaquín jato jascáaresca-
titai; quiquinbires yoashi išhon.

Jatianribi ronqui ipaonique jonibo čhioma.
Jahuéqui retešhon ronqui acáticanai, barin racan-
šhonres piquín. Jatian ronqui ja Incabichoresqui
chiíá ipaonique. Ja chiicancaya ronqui iconbi-
ressiqui queencaticanai, jatíbi jahuéqui huaašhon
picasí. Jascáašhonqui jaquiribi yocácanique;
jabiqui jato meniamapaonique. Jato meniamaa
jonibaon shinana iqui: -Jahuequescáašhonmein non
chií bitiqui -išhon. Jascáašhon bescon quenašhon
yoicana iqui: -Incaibaquea noa chií bišhontan-
huen besconmá -aquín acana iqui. Jascáacanaqui,

JASCATAŠH MANŠHANTEO BETAN ABOBO JONINI

Jascara jaconma shinanya išhon ronqui acá iqui, jahuen rayosqui jaquiribi ašhanti raanquin: -Non jayášhon tee anompari ašhantanhuen, rayosé. Nocon sontárobora en mia raanšhonai, jatoyašhon min ašhanšhon yapa bití -aquinqui acá iqui jahuen rayos. Jainšhon jato yoiribia iqui: -Bocanhuen ea chiní cabánon; empari piaabanon jayá cati -aquinqui acá iqui, jahuen rayos betan jahuen sontárobo.

Jascáa bocana iqui. Bošhonqui acana iqui, ašhanquin. Jatian Yoáshico Incaqui chiní caa iqui, jato benaboi. Caquin nincataqui icá iqui, jahuen rayosqui ašhani: -San Pedro, San Pedro, San Pedro -iiti. Joshin payon teoya, jahuen sontárobo napo nenitašh. Jatian jato ointaan-qui, ja Yoáshico Inca chitícaina iqui. Chití-cainšhon, jahuen piabo naman potaa chori irita iqui.

Jainšhonqui jato saí acá iqui: -¡Aboyašhon-bira manšhanteon yapa queyoaí! -aquinqui jato saí acá iqui. Jato jascáaqui, jatianbi ja sontárobo ihuanašhbi, abobaini boí, nii ionbaina iqui. Jatian jahuen rayosbiribiqui icá iqui, manšhanteo baneti. Jascatašhqui icá iqui, caqueantan, caqueantanašhqui noyacaini; jato napo nenita ihuanašhbi. Jato jascáabainiqui, ja Yoáshico Incaqui moa jahuen šhobon caa iqui.

Jatianqui jahuen baque šhontacoqui (ja manšhanteoaton ahuin) icá iqui, jema napoqui racá racati. Jain racášhonqui, ja šhontaconin oina iqui, abobo mayatai napo manšhanteo mayá mayatai. Jatian ja baque ainbaonqui onana iqui. Onanšhon, jahuen papa yocata iqui: -¿Minca nocon bene jahuequescaaribaatain papá? -aquinqui acá iqui.

Jatian joni paquetašh caa iqui, jatíbiain jato benai. Jatíbiain benaquinbi jato merayamaa iqui. Moa jenen jato queyoo mashibichores icá iqui. Huestíora níibi yama, moa jenen queyoo icašh. Jascáashon jonibo jenen jato queyoo iqui.

Jatian joniqui jatíbiain cahuan cahuana iqui, jato benai; jabi nin huestíora jonitanibi nocoyamaa iqui. Jascatašhqui moa jaquiribi jorí-baa iqui. Jošhon oinnaqui icá iqui, chomo mašh-coshoco bocho sheati yacati. Jaaqui, bišhon joninqui sheaa iqui. Ja abaini jaquiribi caríbaa iqui, jato benaribii. Cašhonbi jato nocoyamari-bia iqui. Jatian joríbaa iqui, jainribi. Jošhon oinnaqui icá iqui jainribi sheati yacati. Jatian ja jonin shearibia iqui.

Jascáashon shinana iqui: -Ramara en sotanai -iqui icá iqui. Jascáashon jonin mai chinia iqui; ja meran sontameeti. Ja mai chiniašh chichó sotameeta iqui, ja joni. Jain sotameeshon nincataqui icá iqui, reboquiri toron iibeirani beí. Jatian jonin picóashon oinnaqui icá iqui rabé ainbo; huetsa reyacaa, huetsa chiacaa. Joašhqui tašhnábecona iqui.

Moa tašhnáashonqui, ja chiacaatonin, reyacaa yoia iqui: -Miimpari mapéashon ointanhuen -aquin acá iqui. Jascáa, ja rehuina ainbo caa iqui, mapeti. Ja mapetai oinašh jaquiribi joni quini meran jiquiribia iqui. Jatian moa mapéquetian oinnašh picóribia iqui.

Picóashon jonin ja ainbo yatana iqui. Ja yatana yoia iqui: -Ea yatanyamahue, oacaya riqui Incan baque, ja min biti jahuen papan raana. Eara jaton ináres iqui -aquin ainbaon acá iqui. Jascáabi, jonin jeneyamaa iqui. Jenenon išhon, bonaboya ninbobo tecamaabiqui jonin jeneyamaa

Jatian ja baquen joni yoia iqui: -Ramara nocon papan jato castícanai. Nenoash quimisha nete senenquetianra oi quiquin quešhtó paquetai; jatianra jenen ehua beai. Ja beaitianra yamecan ehuaribiai. Jascatai oinnašh nane nenqueshaman itan bimia oinnašh jain neenonšhiehue, min baque, min ahuin jatí; jain mato quishpinnon -aquín ja joni acá iqui. Jascáabaini moa caa iqui, jahuen papaiba. Caquin, joni piti menibaina iqui. Jatian moa joni caa iqui, jahuen šhobonco.

Moa quimisha nete senenquetianqui oi quešhto paqueta iqui; rabé chonca nete, rabé chonca yaméribi, oi maana iqui. Jatian jonin jato yoia iqui: -Ramara jenen ehui; moara oi quešhto paquéque -aquín jato acá iqui. Jato jascáabi, joni janson yoincana iqui. Janson yoinšhon ani sheati acana iqui. Ja sheatiaašh paeni iicanaitian jenen ehua beá iqui. Ja beaitianribi yamecan ehuaa iqui. Jascataitian ja jonibiribi jahuen baque, jahuen ahuin jatí nane nenqueshamantonin neeta iqui.

Jascatašhqui ja mashá iqui torotabo, moa jenen jato queyoa nena banécana iqui. Ja paennašh maitaibo, nepašhtaquinique. Ja nanen neeta quimisha jonibiribiqui jainbi ícana iqui, jene tsosinai caman. Jatianqui moa yaméribi acá iqui. Iitiqui ja quimisha jonibi picassa iqui. Picasquin nane joshin bišhon cococana iqui. Jaquiribi nane bimi biríbaa iqui, ja jonin. Bišhon cococana iqui. Jatian sheacasa iqui, ja quimisha jonibi. Jatian yamé meranbi nane joshin meequinqi, chomoshocotonin sheati yatana iqui. Jatian ja sheacana iqui. Jatian picasquin nane meeribia iqui; meequinqi, piti cahuabo, yonan, cobin jaaboqui jonin yatana iqui. Jatian ja pícana iqui. Ja jahuéquiibo ronqui acá iqui. Incanbi jato ašhonabo. Iicaašhqui moa oi nesea iqui. Jatian yaméribi moa ošhnétani acá iqui.